


*Nde Taradžam yahe maana
yahe Djuzo ya mwiso (Djuzo Amma)
Fundi Amjad*

www.islamislands.com

@2016








SURAT : NDO WANADAMU

Hele dzina la Adwahu Mwinyi rehema Mwindji wa yrumbi


- 1.Yamba nga mtsaho ***ndji*** hifadhwi wo hahe Mfaume waho wanadamu.
- 2.Ya miliki wo wanadamu.
- 3.Mgu waho wanadamu.
- 4.Ne shari shaho wadanganyawo(watro waswasi) no dji tsatsaza.
- 5.Wuwo yikawo ngu triyo shaka harumwa yezifuba zaho wanadamu.
- 6.holiho madjini na wanadamu



SURAT : NDE ASUBUHI

Hele dzina la Adwahu Mwinyi rehema Mwindji wa yrumbi


- 1.Yamba ngamtsaho ***ndji*** hifadhwi wohahe Mfaume wahe asubuhi.
- 2.Ne shari sha yizo ya wumba piya.
- 3.Ne shari shahe masihu wo wakati ya zidishawo she hidza.
- 4.Ne shari shaho wanru mazade wako hu vuziya harumwa ye ma fundo.(nde mara masahiri)
- 5.Ne shari shahe hasidi wo wakati ya husudiwu.



SURAT : NDO WU RAHATSIFU

Hele dzina la Adwahu Mwinyi rehema Mwindji wa yrumbi


- 1.Yamba wuwo nde Adwahu mdzima.
2. Adwahu nde wukusudiwa.
- 3.Na kadja zaya wala kadja zalwa.
- 4.Na katsina wu lingano naye.



SURAT: NZO MBONDZI

Hele dzina la Adwahu Mwinyi rehema Mwindji wa yrumbi


1. Yangamiya ye mihono ya Abu Lahabi.
2. Kedja nfayi ye mali ya hahe na hayna ya tuma.
3. Ngudjo ndjiya harumwa mdro mhali wendza nfubi.
4. Ne mdru msha hahe mrwawa nkuni.
5. Harumwa ye ntsingo ya hahe mbonzi ya pvahasiwa.



SURAT: NDO WU PVESHEZI

Hele dzina la Adwahu Mwinyi rehema Mwindji wa yrumbi


1. Yeka zidja wo wu pveshezi wa Adhwahu no mbuwo ye Makatu'mukarama.
2. Na hu wono wo wanadamu ngwa ndjiyawo harumwa ye dini ya Adhwahu ma funvu ha ma funvu.
3. Apvenge rahatsa heze himida zahe Mfomi waho, na wu tsahe msamaha pvo waye djuwu, hakika yeye kadja rantsi huka mwindji wahu tubiya.



SURAT: NDE MAKAFIRI

Hele dzina la Adwahu Mwinyi rehema Mwindji wa yrumbi

1. Yamba, yenyi makafiri.
2. Ntsu ambudiya yisho mwambudiyawo.
3. Nanyi kamtsu ambudiya wuwo ni ambudiyawo.
4. Wala miymi tsi wahu ambudiya ysho mwambudiyawo.
5. Wala nyinyi tsi wahu ambudiya wuwo ni ambudiyawo.
6. Nganyina ye dini ya hanyu na ngamina ye dini ya hangu.



SURAT: NDE KAUTHARI

Hele dzina la Adwahu Mwinyi rehema Mwindji wa yrumbi


1. Hakika ri hunika ye Kauthar¹.
2. Apvenge swalí he Mfomi waho na wu tsindze ye ngamiya.
3. Hakika ye wu hu taabisho wuwo nde ya tsindziha no wo mdunga.

SURAT: NDE MANUFAN MANGU

Hele dzina la Adwahu Mwinyi rehema Mwindji wa yrumbi

1. A hu wono wuwo yikawo ngu kadhibisho wowusiku wahe zilipvwa.
2. Bahi wuwo nduwo yikawo ye hu dumbiza ye yatima.
3. Na ye kado hafiliha no lisa ze masikini.
4. Bahi wa ngamifu ndo waho waswaliwu.
5. Wawo yikawo harumwa ze swala za hawo ngwa diwazawo.
6. Wawo yikawo ngwa dongo hu wonisa.
7. Na hu ziyya ye mba yza manufaa ntiti.


¹ -Wuwo mdro wulo harumwa ye mbepvo.



SURAT: KURAYSHI

Hele dzina la Adwahu Mwinyi rehema Mwindji wa yrumbi


1. Wu trulivu harumwa ye Banu Kurayshi.
2. Wu trulivu wo harumwa wo msafara wo pvo baridi djuwu no wo pvo djotro djuwu.
3. Nge na wa ambudiye ye Mfaume wahe ye nyumba yinu. (nde al Kaaba)
4. Wuwo yikawo ha walisa harumwa ndzaya na ha wa makinisha na hayna khofu.



SURAT: NDE NDOVU

Hele dzina la Adwahu Mwinyi rehema Mwindji wa yrumbi


1. A kudja wona namna dje ye Mfomi waho ya fannyiya wo wandru wahe ndovu
2. A kadja djayliya ze nnuwu zahawo harumwa wu dhalilifu.
3. Ya pveha pvo wawo djuwu nuni ha ma funvu ma funvu.
4. Zi wa vurizawo wana mawe wa mdro.
5. **Alafu** hawa rende dja mani ya huma ya liwa.



SURAT: NDO WUKALIZI

Hele dzina la Adwahu Mwinyi rehema Mwindji wa yrumbi

1. Andhabu nkali ya hayni mkalizi mdrudja wandru.
2. Wuwo yikawo ha wundjiliya mali na hu ywaza.
3. Ngu wazo huka ye mali yahahe ngedjo hu mhantsi duniyani dayma.
4. Tsi djawu, hakika ngudjo vuriziwa harumwa wo mdro.
5. A hu djuwa dje wo mdro wa djahanama?
6. Ndo mdro wa Adhwahu wa vuziwa.
7. Yikawo ngo hondrawo ye miyo.
8. Hakika wu balwa ho djumwawo.
9. Harumwa bundo la lepeziwa.



SURAT: NDE LAASWIRI


Hele dzina la Adwahu Mwinyi rehema Mwindji wa yrumbi

1. Nga mlapvo he laanswiri. (hawu he zama)
2. Hakika mwana damu nge harumwa hasara.
3. Badi wo wa amini na wa fanya ammali ndjema na wa wu swiyana ye haki na wa wu swiyana wo wu swibirifu.

SURAT: NDO MDJENDJEZO

Hele dzina la Adwahu Mwinyi rehema Mwindji wa yrumbi

1. Wu mshuhulisani wo mdje ndjezo ho windji
2. Hata mwaswili ho makaburini.
3. Tsi djawu ngamdjo hudjuwa.
4. Kisha tsi djawu, nga mdjo hudjuwa.
5. Tsi djawu; yenge nga mdjuuwawo ye yilimu ya kweli.
6. Nga mdjo hu wona wo mdro wa djahanama.
7. Kisha nga mdjo hu wu wona ha wu woni wa wukweli.
8. Kisha nga mdjo hu wuzisiwa wo wusiku wuwo ze neema.




SURAT: NDO MREMO

Hele dzina la Adwahu Mwinyi rehema Mwindji wa yrumbi

1. Wo mremo. (nde ntswa kiyama)
2. Ndawupvi wo mremo?
3. A hudjuwa dje wo mremo?
4. Wo wusiku wo wana damu wadjo hu rendeha dja mapvandzi ya tsambaliya.
5. Na yemilima yi rendeha dja sufi ya tsanulwa.
6. Amma wuwo yikawo ye zipvimo za hahe zi zorosa.
7. Bahi wuwo ngudjoka harumwa wu hayati ya ridhhi nuwu.
8. Amma wuwo yikawo ngizo nyangu yezi pvimo za hahe.
9. Bahi ye mdzadza² hahe ndo mro wa djahanama.
10. A hu wu djuwa dje?
11. Mdro mhali.


² -Yani ye maredjeyi ya hahe ndo mdro wa djahanama.



SURAT: NDEZE MPUNDRA

Hele dzina la Adwahu Mwinyi rehema Mwindji wa yrumbi


1. Nga mlapvo heze mpundra ze ndao ha mbwiri ha hu towa dji.
2. Na Nga mlapvo he zi towowawo ye ma cenyé ya mdro heze nkaro.
3. Na Nga mlapvo he zi dzubiyawo yema andwiyi pvo trasi.
4. Alafu za djusa gapva djindji.
5. Za rudi za ndjiya pvhari mwe ma andwi.
6. Hakika mwanadamu ho hahe ye Mfomi wahe ye mwindji wa hu hana.
7. Naye ho djumwizo ngu shuhudiyo.
8. Naye na puupa djindji lo handza mali.
9. A katsu djuwa wo wakati wadjo hu towolwa wo walo ho makaburini.
10. Na zidjo hu tsanganyiwa ye zilo ho zi fubani.
11. Hakika wo wusiku wuwo ye Mfomi wawo ye Mdjuzi pvo wawo djuwu.



SURAT: NDO MRINDRINDRO

Hele dzina la Adwahu Mwinyi rehema Mwindji wa yrumbi


1. Na mwesheleye wo wakati she ypvande sha ntsi shidjo hu rindrindra wo mrindrindro wa hasho.
2. Na she ypvande sha ntsi shi towowa ye mizigo ya hasho.
3. Na mwana damu hamba huka ye shi hundrwa ni ndazi?
4. Wo wusiku wuwo ngashidjo hamba ze khabari za hasho.
5. Hahuka ye Mfomi waho ha huysha pvo wisho djuwu.
6. Wo wusiku wuwo ngwadjo hurowoha wo wana damu hama funvu ma funvu yili wa wonisiwa ze ammali za hawo.
7. Apvenge hayni ya fanya mba ammali ndjema ya wudziro wa mba gapva ngudjo yi wona.
8. Na hayna ya fanya mba ammali mbi ya wudziro wa mba gapva ngudjo yi wona.



SURAT: NDO WUPVENUFU

Hele dzina la Adwahu Mwinyi rehema Mwindji wa yrumbi


1. Kwadja wo wandru wa kufuru harumwa wo wandru wahe shiyo no wa shiriki Mgu wa ziyiye hata wu wa djiliya wo wu pvenufu.
2. Ndrume ya lawana na Adhwahu yi somawo nkade ndrahafu.
3. Harumwizo ziyo za djimiliya.
4. Na kwadja khitalifiyana wo wandru wa pveshewa ye shiyo yeka tsi baabda wa djiliwa no wupvenufu.
5. Na kwadja amrishiwa yeka tsi ndo huka wa ambudiye Adhwahu ha wu rahatsifu wa niya, ye dini yo ya hahe, na hahu nyamiliya, no huka wa djimize ye swala na wa tekeleze ye zaka na yiyo nde dini nyongofu.
6. Hakika wo wa kufuru harumwa wo wandru wahe shiyo no wa shiriki Mgu ngwawo harumwa wo mdro wa djahanama mbaki wa dayma harumuwo, wawo ndo wayi wahe zi wumbe.
7. Hakika wo wa amini Mgu nawa fanya ammali ndjema wawo ndo wa kayiri wahe ziwumbe.
8. Ye zilipwa zahawo ngizo wo hahe Mfomi wawo, ma bustani yikawo ngapvwendawo miri hotroni mwiyo, mbaki wa dayma harumwa yo, Adhwahu hardhi nawo, nawo waridhi na Adhwahu yizo zahe ya ra ye Mfomi wahe.
- 9.
- 10.
- 11.



SURAT: NDE AL KADR

Hele dzina la Adwahu Mwinyi rehema Mwindji wa yrumbi

1. Hakika si ri yi sisi harumwa ye masihu matukufu.
2. A hu djuwa dje ye massihu matukufu?
3. Ye masihu matukufu yo kayri hana mezi shihwi.
4. Yo husiha ye malayka na djibrilu harumwa yo he ruhusa yahe Mfomi wayo ha wubaliya hayna amri.
5. Yo amani hata wu honda wo mheyo wahe al fadjri.



SURAT: NLO PANGA LA DAMU


Hele dzina la Adwahu Mwinyi rehema Mwindji wa yrumbi

1. Soma hele dzina lahe Mfomi waho yikawo nde ya wumba.
2. Ha wumbu mwana damu ha panga la damu.
3. Soma na ye Mfomi waho nde Mtukufu.
4. Yikawo ha somisa ha kalamu.
5. Ha somisa mwana damu yizo yatso hu djuwa.
6. Tsi djau, hakika mwana damu hashe mipaka.
7. Ba hadji wono tadjiri.
8. Hakika wo hahe Mfomi waho ndo pwwalo mdredjeyi.
9. A hu wono ye wu ziyyiyo.
10. Ye mtrwana wo wakati ya swaliwu.
11. A hu wono yeka ye nge harumwa wongofu.
12. Hawu ha amrisha hora Mgu.
13. A hu wono yeka ha kadhibisha na hapva dingo.
14. A katsu djuwa huka hakika Adhwahu ngu m'mono.
15. Tsi djawu, yeka kadja ziyyiya, ngaridjo hu mrenga hele pazi la wuso.
16. Wuso wa mwamba ndrabo wa mdrenda mbi.
17. Nge napare wo wandrwa hahe.
18. Ngardijo hupara ye malayka yahe andhabu.
19. Tsi djawu! Wutsi mtweyi na sudjudiya na wudji tsengeze.

SURAT: NDO MRI WA TINI

Hele dzina la Adwahu Mwinyi rehema Mwindji wa yrumbi


1. Nga mlapvo ho mdri wa tini no mdri wa zaytuni.
2. Nga mlapvo ho mlima wa Tu Saynay.
3. Nga mlapvo ho mdji m'aminifu wunu.
4. Hakika ri wumbu mwana damu ha wema wa wu nyongofu.
5. Kisha ri mdjeza ho ntsini (Ri mrende mdru mduhazi).
6. Badi wawo yikawo wa amini na wa fanya ammali ndjema, bahi wawo ngwa wona zilpvwa zema zi tsona mwiso.
7. Ye baanda zinu hindrini yeza hu tsonga wu kadhibishe ye ntsihu yahe zi lipvwa.
8. A kedjaka adhwahu Nde Mandilifu hodjumwa wo wa andilifu piya.



SURAT: NDO MRAHATSO

Hele dzina la Adwahu Mwinyi rehema Mwindji wa yrumbi

1. A karidja hu rahatsiza she yfuba sha haho.
2. Na ra hwe hantsi wo mdzo mdziro.
3. Yizo ykawo zi hu zorosa le dingo lahaho.
4. Ra tukuza wo nvumbulwa haho.
5. Bahi hakika pvwamwedja na hayna wu songefu ngapvo wangufu.
6. Hakika pvwamwedja na hayna wu songefu ngapvo wangufu.
7. Yeka hutimizi djimiza ye ybada.
8. No hahe Mfomi waho ndo fanya pupa.



SURAT: NDO MTSANA TRASI

Hele dzina la Adwahu Mwinyi rehema Mwindji wa yrumbi


1. Nga mlapvo ho mtsana trasi.
2. Ne masihu wo wakati ya zidishawo she hidza.
3. Kadja hurantsi ye Mfomi waho.
4. Na hakika ye akhira yo kayri pvo wawe djuwu hana ye duniya.
5. Na ye Mfomi waho ngudjo hunika nawe ngodjo ridhi.
6. A kadja hu hundra yatima pvahe ya hu nika pvo kantsi.
7. Na ya hu hundra wa poteya pvahe ya hongowa.
8. Na ya hu hundra masikini pvahe yahu tadjirisa.
9. Amma ye yatima bahi wutsi mkadamize.
10. Na amma ye mmizi bahi wutsi mharazize.
11. Amma ye neema yahe Mfomi waho bahi yi towowe hadisi.



SURAT: NDE MASIHU

Hele dzina la Adwahu Mwinyi rehema Mwindji wa yrumbi


1. Nga mlapvo he masihu wo wakati ya bayawo wo wulemengu.
2. Nga mlapvo ho mtsana wo wakati wu walawo.
3. Nga mlapvo he ya wumba ye shi wume ne shi she.
4. Hakika yeze ammali za hanyu zi khitalifiyana.
5. Amma ye ya towowa ye mali ya hahe na yara Mgu.
6. Ya swidikisha ye mbepvo.
7. Ngaridjo hu mwangusiza heze nyangu.
8. Amma ye ya fanya wu nfurwa yadji wona huka ye ndo tadjiri.
9. Na ya kadhibisha ze ndjema.
10. Ngaridjo hu mwangusiza wo wu songefu.
11. Na kena hu nfayi ye mali ya hahe wo wakati yadjoka hwangamiya.
12. Hakika pvo wasi djuwu ndo pwalo wo wongofu.
13. Na hakika zo zahatru ye akhira ne duniya.
14. Na tsi mhadharishani mdro wu vuwawo.
15. Kana hu wundjiya yeka tsinde ya tumba mpaka.
16. Wuwo yikawo hakadhibisha hapva dingo.
17. Na ngudjo wepva ye mdra mgu.
18. Wuwo yikawo ngu towowo ye mali ya hahe yadji rahatse.
19. Na ko wulona pvo waye djuwu neema ya yilipvawo.
20. Yitso hahu tsaha ze radhi zahe Mfomi wahe yenda hadjuwu.
21. Na hakika ngudjo ridhi.



SURAT: NLO DJUWA

Hele dzina la Adwahu Mwinyi rehema Mwindji wa yrumbi

1. Nga mlapvo he le djuwa no wewu wa halo.
2. Nga mlapvo ho mwezi wo wakati wuli dungawo.
3. Nga mlapvo ho mtsana wo wakati walipvenuwa.
4. Nga mlapvo he massihu wo wakati yali bayawo.
5. Nga mlapvo ho wingu ne ya wu panga.
6. Nga mlapvo he she ypvande sha ntsi ne ya shi radjisa.
7. Nga mlapvo he nafusi ne ya yi lindzanyisa.
8. Na hayi fehemisha wo wu tumbifu mpaka wa hayo no mdro Mgu hayo.
9. Hakika hanali sanda ye ya yi twahirisha.
10. Na hakika hangamiya ye ya yi kadamiza.
11. Yi kadhibisha ye kaum Thamuda ho wiyi wa hayo.
12. Wo wakati yadji pwa hwenda ye mtumbifu mpaka wa hayo.
13. Wo wakati yiyo ye ndrume ya Adhwahu ha wambiya huka: "nde ngamiya ya Adhwahu no mno hayo".
14. Alafu wa mkadhibisha wa ytsindzi; pvahe ye Mfomi wawo ha wangamiza hele kosa la hawo naye ha wa lindzanyisa.
15. Na Adhwahu katsu releya ye zidjo hu dunga.



SURAT: NDO MDJI

Hele dzina la Adwahu Mwinyi rehema Mwindji wa yrumbi

1. Nga mlapvo ho mdji wunu (Makatu' mukarama).
2. Nawe mkazi waho mdji wunu.
3. Na nga mlapvo he ya zaya nisho ya zaya.
4. Hakika ri wumbu mwanadamu harumwa mashaka mendji.
5. A ngu dhwani huka ko mdru wudjo mshinda.
6. Ngwambo tsi rumiya mali nyindji
7. A ngu dhwani huka ko mdru wu m'mono.
8. A kariidja mdjayliya mtso mayli.
9. Na ulime na malomo mayli.
10. Na ra mokoza ze ndziya zo mbili.
11. Kerenge hadji triya harumwa wo mheyo³.
12. A hudjowa wo mheye.
13. Ndo mdro mtrwana huri.
14. Hawu ho lisa harumwa wusiku wendza twauni.
15. Yatima mwendza wu nduhuze.
16. Hawu masikini ya djaya gapva.
17. Kisha zi kaya wo haho wa amini wawu swiyana wu swibirifu na wa wuswiyanu yrumbi.
18. Wawo ndo wandru waho muwumeni.
19. No wa kufuru ze dalili za hatru wawo ndo waho wusheni.
20. Ho djumwa wo mdro wa balwa.


³ -Yenge hadji triya harumwa hazi ndziro yitso ndo huka kinyume na Mtrume.

21.

SURAT: NDE AL FADJRI

Hele dzina la Adwahu Mwinyi rehema Mwindji wa yrumbi

1. Nga mlapvo he al fadjri.
2. Na nga mlapvo he masihu kume.
3. Na nga mlapvo he zili zili ne shilo ygumwe.
4. Na nga mlapvo he masihu wo wakati yalawawo.
5. Harumwa zinu ngapvo zilapvo.
6. A kudja wona namna dje ye Mfaumi waho ya fanyiya ye kaumu Andu.
7. Ye kabilia ya Iram yendza madjumba mahuwu.
8. Yikawo kapvwadja wubwa nfano mwawo ho midjini.
9. Na thamuda ykawo ndo wa pasuwa le gaya harumwa le djangwa.
10. Na Firauna mwendza ye madjeysi.
11. Wawo ykawo washe mipaka ho midjini.
12. Wa zidisha wo wu fisidifu harumwiyo.
13. Pvahe Mfomi waho ha sisi ho djumwawo ye andhabu nkali.
14. Hakika ye Mfomi waho ngu pviriliyo.
15. Ama mwanadamu, yeka ye Mfomi wahe hamlawuza, ha mtukuza na ha mneemesha, ye ngwambo ye Mfomi wangu hani tukuza.
16. Ama yeka ha mlawuza hamkiyasiza pvo waye djuwu ye riziki ya hahe ye hwamba ye Mfomi wangu hani pvunguwa.
17. Tsi djawu bal kamtsu wa renda ndjema ye ma yatima.
18. Na kamtsu triniyana djitihadi ho djumwa ye sha hula shahe masikini.


- 
19. Na nga mlawo ze mali zahe ma yatima mlo mdziro.
 20. Na nga mwandzawo mali ha mahaba mendji.
 21. Tsi djawu, namwesheleye wo wakati she ypvande sha ntsi shidjo hu rindrindra mirindrindro ya dungana.
 22. Na hadja ye Mfomi waho wakati yikawo ye malayka ya himi ma bamba.
 23. Na wu hudhurushiwa wo wusiku wuwo wo mdro wa djahanama; wo wusiku wuwo mwanadamu ngudjo yesheleya, na ndahupvi yalona fayda yahe le besheleya.
 24. Ngwambo kerenge tsi trendeza (ammali ndjema) ho wu hayati wa hangu.
 25. Bahi wo wusiku wuwo kana hu andhibuu he andhabu ya hahe mdru mdrwadji.
 26. Na kana hu funga ha silisi ye zi fungo za hahe mdru mdrwadji.
 27. Ye we nafusi ya truliliya.
 28. Redjey wo hahe Mfomi waho hahu ridhi ba hu kubaliwa.
 29. Nge ndjiya harumwa wo wa trwana wa hangu.
 30. Na wu ndjiye harumwa ye mbepvo ya hangu.




SURAT: NDE SHI FINIHAWO

Hele dzina la Adwahu Mwinyi rehema Mwindji wa yrumbi

1. A yi hu hondro ya khabari yahe shi finihawo.
2. Nyiso wo wusiku wuwo ngazidjo huka nyi dhalilifu.
3. Za rumisshiha, ha tambu nyindji.
4. Ngazidjo hu trilwa harumwa mdro mhali.
5. Ngwa nosewawo nviya ya hondra wo mwiso wahu pvisa.
6. Kwa tsina sha hula yeka tsi mdri mhali.
7. Wo ko nenesa wala hu towowa ndzaya.
8. Na nyiso yi kawo wo wusiku wuwo nga zidjodo zagaza.
9. Wo mwendo hazo wu rdhisha.
10. Harumwa mbepvo ya hadjuwu.
11. Kwa yshiya mwaydju harumwizo.
12. Harumwiyo nviya zendawo.
13. Ngapvo harumwizo zi tranda zilo hadjuwu.
14. Na zinoleyo za yhantsiwa.
15. Na mitawo ya halwa swafi swafi.
16. Na ma tapi ya nyongolwa.
17. A kwatsu angaliya ye ngamiya ye namna dje ya wumbbwa?
18. Na yeze mbingu namna dje ndo za heziwa hadjuwu.
19. Na ye milima namna dje ndo ya nyongolwa.
20. Na yeshe ypvande sha ntsi namna dje ndo sha radjisawa.
21. Wa ydhwiye, hakika we wa hu ydhwiya.
22. Kedjaka wewe pvo wawo djuwu mdru wahu rendza nvuwu.


- 
23. Badi ye yapva dingo na ya kufuru.
 24. Bahi Adhwahu ngudjo mandhibu ye andhabu nkuwu.
 25. Hakika pvo wasi djuwu ndo pwalo wo mredjey wa hawo.
 26. Kisha pvo wasi djuwu ndo mhisabulwa hawo.



SURAT: NDE YENDA DJUWU

Hele dzina la Adwahu Mwinyi rehema Mwindji wa yrumbi


1. Rahatsa ledzina lahe Mfomi waho Mtukufu.
2. Ye ya wumba ya lindzanyisa.
3. Na ya kiyasi yarudi ya wokowa.
4. Na ya towowa le trunku lahe zinyama.
5. Yali humisa la rendeha dzidu.
6. Ngaridjo wu hu soma nawe kuna hu diwaza.
7. Badi yizo Adhwahu yandzawo, hakika ngu djuwo yeza pvenuha neza tsatsaya.
8. Na ngaridjo wuhu sahilishiya he zilo nyangu.
9. Apvenge yesheleziza yeka ngo fayiwu wo mweshelezizo.
10. Ngudjo yesheleya wuwo yikawo nguro Mgu.
11. Ngudjo yenda hule nuwo ye ya tumba mpaka.
12. Wuwo yikawo ngudjo ndjiya harumwa wo mdro wo mhuwu.
13. Kisha kana hufa harumuwo wala kana huka na muwo.
14. Hakika hawokoha ye yadji twahirisha.
15. Ya vumbuwa ledzina lahe Mfomi wahe kisha ya swal.
16. Bal ! Nga mtukuzawo wo wu hayati wa duniya.
17. Hali yahuka ye akhira yo kayiri na mbaki wa dayma.
18. Hakika ye mawaydhwa yanu ngayo harumwa ze nkade za trende.
19. Ze nkade za Ibrahima na Musa.



SURAT: NDE NYORA YAHE MASIHU

Hele dzina la Adwahu Mwinyi rehema Mwindji wa yrumbi


1. Nga mlapvo hele bingu ne nyora yiko hudja ye masihu.
2. Na a hudjuwa dje ye yko hudja ye masihu?
3. Nde nyora yiko hu wala.
4. Hakika ko nafusi yeka tsindo huka ngiyona wo yi pviriliya.
5. Nge nangaliye mwanadamu a ha hindri ndo ya wumbwa hisho?
6. Ha wumbwa ha madji ya trilwa ha upesi.
7. Nga rowohawo ye bayna yaho wuzwa dingo ne ziba zahe she yfuba.
8. Hakika ye Mshindzi ho djumwa wo mdredjezo ha mara ya pvili.
9. Wo wusiku zidjo hu pvenulwa ze siri.
10. Baho hayzo katsina nnuwu wala mbeshezi wo wakati wuwo.
11. Nga mlapvo hele bingu lendza yeshi redjeyiwu(yani nde nnuwa).
12. Nga mlapvo heshe ypvande sha ntsi shendza mpasuho.
13. Hakika ye Kur'ani yiyo mrongowo wa hu pvadzawuwa.
14. Na yo tsi ntsapvuho.
15. Hakika wowo ngwa pangishawo makri.
16. Nami nga mpangisho makri.
17. Wutsi fanye mbwiri, nga mwaniko mba muda ntinti.




SURAT: NDE MISIHO YAHE ZE NYORA

Hele dzina la Adwahu Mwinyi rehema Mwindji wa yrumbi

1. Nga mlapvo ho wingu wendza ye misiho yahe ze nyora.
2. Nga mlapvo he ntsihu ya kiyama.
3. Nga mlapvo he wu towowo wo wushahidi nezi shuhudiliwawo.
4. Wa laaniwa wo wenyi hu tsimba yema gali.
5. Wo mdro wendza nkuni zindji.
6. Wo wakati wakantsi ho djumuwo.
7. Nawo ho djumwa yizo wa fanyiyawo ye ma ysilamu ngwa shuhudiyawo.
8. Na kwadja rendzwa nnuwu yeka tsindo huka wa amini Adhwahu Mshindzi Mwinyi hu himidiwa.
9. Wuwo yikawo ngena wo wu faume wahe ze mbingu neshe ypvande sha ntsi, na Adhwahu ngu shuhudiyo hodjumwa hayni hindru.
10. Hakika wo wandru wa andhibu wo wandrwa ume wa amini no wandru mazade wa amini kisha watsu tubiya bahi wandaliwa ye andhabu yaho mdro wa djahanama na wandaliwa ye andhabu yaho mbisiwa.
11. Hakika wo wa amini na wa fanya ammali ndjema wandaliwa mbepvo yikawo nga pvendawo miro hotroni mwiyo, wuwo ndo wongofu wo mhuwu.
12. Hakika wo mtsambuzo wahe Mfomi waho wo mdziro.
13. Hakika yeye nde mwinyi hwandisa nde mwinyi hu redjeza mara ya saya.
14. Naye nde Mwindji wahu samihi, Mwendza mahaba yaho wa amini.
15. Nde mwendza yeshe hiri shi tukufu.
16. Nfanya yizo yandzawo.
17. A yi hu hondro ye khabari yahe ma djeyishi.


- 
18. Firauna na Thamuda.
 19. Bal wo wandru wa kufuru ngwawo harumwa mkadhibisho.
 20. Na Adhwahu hazingiza ho dingoni mwawo.
 21. Bal yiyo Kur'ani nyi tukufu.
 22. Ngiyo harumwa shiyo sha hifadhwihha.




SURAT: NDO MPASUHO

Hele dzina la Adwahu Mwinyi rehema Mwindji wa yrumbi

1. Wo wakati wo wingu wudjo hu pasuha.
2. **Wi yishiya ye amri yahe Mfomi wawo niyo haki.**
3. Wo wakati she ypvande sha ntsi shidjo hu lepa.
4. Shi towowe ye piya yahe zilo ho mbani mwisho shi baki yiruvu.
5. **Na shi yshiya ye amri yahe Mfomi washo niyo haki.**
6. Ye we mwanadamu we hu hana wo hahe Mfomi waho mhano mwiyi na ngodjo hondrana naye.
7. Amma ye wudjo nikiwa ye shiyo sha hahe wo muwumeni.
8. Bahi wuwo ngudjo hisabulwa yisabu shangu.
9. Na ngudjo redjeyi wo haho wanduzahé na furaha.
10. Amma ye wudjo nikiwa ye shiyo sha hahe ho dingoni.
11. Bahi ngudjodo rumiza wangamifu.
12. Na ngudjo ndjiya mdroni.
13. Hakika yeye hado kaya harumwa wanduzahé na furaha nyindji.
14. Hakika yeye haka hadhwani huka kana hu baythilwa.
15. Tsindizo, hakika ye Mfomi waho kadja rantsi hu m'mona.
16. Bahi hakika nga mlapvo he mayingu mankudu.
17. Na nga mlapvo he masihu nizo ya tsanganya.
18. Na nga mlapvo ho mwezi wo wakati wuko hu kamiliha.
19. Hakika ngamdjo hu hondrana hali baanda zindravadji.
20. A ngwawona ndrongowo hindri watso hu amini.

- 
21. Na yeka yi somwa pvo wawo djuwu ye Kur'ani kwatsu sudjudiya.
 22. Bal, wawo yikawo wa kufuru ngwa ambawo ndrabo.
 23. Na Adhwahu nde Mdjuzi wa yizo wa tsatsazawo.
 24. Apvenge wa fanye wuzade wa huka ngwa wona andhabu nkali.
 25. Badi wo wa amini wa fanya ammali ndjema ngwawona zilipvwa zi tsona mwiso.




SURAT: NDO WA PVUNGUZAWO

Hele dzina la Adwahu Mwinyi rehema Mwindji wa yrumbi

1. Wangamifu waho wapvunguzawo ye zipvimo.
2. Wawo yikawo yeka ngwa dji pvimiyawo ho djumwa wo wanadamu wo hu kamilisha.
3. No wakati wako hu wa pvimiya ha mpishi hawu ha wizani wo hu pvunguza.
4. A wo wandru wawo kwatsu fikiri huka ngwadjo hu baythiwa.
5. Ha wusiku mtukufu mdziro.
6. Wusiku ykawo wo wanadamu ngwadjo huhima he Mfaume waho wulemengu.
7. Tsi djawu! Hakika ye shiyo shahe makafiri ngisho harumwa mahala masimivu.
8. A hudjuwadje, ye mahala masamivu?
9. shiyo sha remwa shampa.
10. Wangamifu wo wusiku wuwo ndo wahe makafiri.
11. Wo wakadhibishawo ye ntsihu yahe zilipvwa.
12. Nako wuko hu kadhibisha yeka tsinde yasha mpaka mwenda madhambi mendji.
13. Yeka zi somwa pvo waye djuwu ze aya za hatru ye hwamba huka misitiri yaho wa trende.
14. Tsi djawu bal yizo waka hudo renda zi baya ho djumwa ye miyo ya hawo.
15. Tsi djawu, hakika wowo ngwadjo hu baliliwa ye Mfaumi wawo wo wusiku wuwo.
16. Kisha, hakika wowo ngwadjo hu trilwa harumwa wo mdro wa djahanama.
17. Kisha, ngwadjo hwambilwa huka ynu ndayla yikawo mka hudo yi kadhibisha.

18. Tsi djawu, hakika ye shiyo shahe mara Mgu ngisho harumwa mahala matukufu.
19. Ye hudjuwa dje ye mahala matukufu?
20. Shiyo sha remwa shampa.
21. Ngwadjo hushi shuhudiya wawo yikawo ngwawo karibu.
22. Hakika ye mara Mgu ngwawo harumwa neema.
23. Ho djumwa ye zi tranda ngwa angaliyawo.
24. Ngo djuwo harumwa ze nyiso za hawo ye nuru yahe ye neema.
25. Ngwa nosiwawo ha nvinyo ndjema ya remwa mhori.
26. Wo mwiso wa hayo vushe la miski; no harumwizo nge nwa saruhe wo wenyi hu saruha.
27. No mbihanyiwa ha yo ha Tasnim⁴.
28. Nviya wadjo hu yinwa wowa wowa kurubiya.
29. Hakika ye makafiri waka hudo tsesheya wo wa amini.
30. Yeka wapvirana nawo wado wa rudja.
31. Neka wa redjeyi wo wandzawo wado redjeyi na furaha na ntseho.
32. Neka wa wawono wado hamba hakika wanu ngwawo harumwa wu potefu.
33. Nawo kwadja pvehwa wa hu wahifadhwí pvo wawo djuwu.
34. Apvonge lelo wo wa amini ngwa tsesheleyawo ye makafiri.
35. Ho djumwa zitranda angaliyawo.
36. A wa lipvwa ye makafiri yizo waka hu renda.

⁴ - Wuwo mdro mhuwu wulo harumwa ye mbepvo.



SURAT: NDO MWALIHO

Hele dzina la Adwahu Mwinyi rehema Mwindji wa yrumbi


1. Wo wakati wo wingu wudjo hu waliha.
2. No wakati ze nyora zidjo hu tsambaliya.
3. No wakati ze bahari zidjo hu tsanganyiha.
4. No wakati ye makaburi yadjo hu haulwa.
5. Ngedjo hu djuwa ye nafusi yizo ya trendeza nizo ya dundza.
6. Yewe bo mwanadamu ndrongo hindri ndeza hu hadaya ne Mfomi waho Mtujufu.
7. Wuwo yikawo hahu wumbu alafu hahu lindzanyisa harudi hahu panga.
8. Harumwa hayni suraya yaka hwandza ndo yahu pangisha.
9. Tsi djawu! Bal nyi nga mkadhibishawo ye ntswa kiyama.
10. Na hakika ho djumwanyi ngapvo malayka wa zingarawo ze ammali.
11. Matukufu wandzihawo yizo wa dhibitiwu.
12. Ngwa djuwawo yizo mdrendawo.
13. Hakika ye mara Mgu ngwadjo huka harumwa neema.
14. Na hakika ye makafiri ngwadjo huka harumwa wo mdro.
15. Ngwadjo hundjiya ye ntsihu yahe zilipvwa.
16. Nawo kwatsina hu ytrawa pvo wiyo djuwu.
17. E hu djuwa dje ye ntsihu yahe zilipvwa?
18. Kisha hudjuwa dje ye ntsihu yahe zilipvwa?
19. Ndo wusiku yikawo kedja milikiya nafusi hoha nafusi nyindravadji mba ndrongowo na ye amri piya wo wusiku wuwo ngiyo ya Adhwahu.



SURAT: NDO MBERO

Hele dzina la Adwahu Mwinyi rehema Mwindji wa yrumbi

1. Wo wakati le djuwa ledjo hupverwa.
2. No wakati ze nyora zidjo hu tsambaliya.
3. No wakati ye milima yedjo hupvewusiwa.
4. No wakati ye ngamiya yilo hamili yidjo hurantsiwa pvertsina wo yilela.
5. No wakati ye zinyama zidjo hu wundjiliwa.
6. No wakati ze bahari zidjo hu trwa mdro.
7. No wakati ze nafusi zidjo hu tsanganyiwa.
8. No wakati wo wana washe wadzihwa na muwo wadjo hu wuzisiwa.
9. A hadhambi hindrini do waka hu ralwa hitswa?
10. No wakati ze nkade zahe ze ammali zidjo hu tsambaziwa.
11. No wakati ze mbingu zidjo hu tsunwa.
12. No wakati wo mdro wa djahanama wudjo hu vuziwa.
13. No wakati ye mbepvo yidjo hu tsengeziwa.
14. Ngedjo hudjuwa ye nafusi yizo yadja nizo.
15. Bahi nga mlapvo heze nyora ziko hudziha ye mitsana.
16. Ne ziko hwenda na hudji dziha zeka kazi woniha.
17. Nga mlapvo he masihu wo wakati yako hutra she hidza.
18. Na nga mlapvo he asubuhi wo wakati yiko hutra wo wewu.
19. Hakika wunu mdrongowo wa baliwa ni ndrume nyi tukufu.
20. Yenza nnuwu, ya truliliya hosoni mwe mwinyi ye anrshi.
21. Ye tweyilwawo, kisha yo nyi aminifu.
22. Na kedja ye mdru mlo nyi naye ngena wudjufumuwo.

- 
23. Na hakika ha mmono ho harumwa ze mbebe na mbembe za pvenuha.
 24. Na kadjaka yeye bakhili waho wahayi.
 25. Na kedjaka ye Kur'ani yinu yo mrongowo za Shetwani.
 26. Apvenge ye ngamwendo ndahu?
 27. Kedjaka yinu yeka tsi beshelezizo laho wu lemengu.
 28. He wandzo harumwanyi ya rengeleye.
 29. Nanyi kamna hushinda mwandze yeka tsi ndeka Adhwahu Mfaume waho wulemengu ngwandzo.



SURAT: NDE YA SINYA WO WUSO

Hele dzina la Adwahu Mwinyi rehema Mwindji wa yrumbi

1. Ha sinyo wuso hapva dingo.
2. Ha sibabu ya huka ha mdjiliya ye nfu matso.
3. Ye hu djuwa dje huka hwenda yadji twahirishe.
4. Hawu ya yesheleziziwa alafu le beshelezizo li nfayi.
5. Amma yeya dji wona mhuwu nizo wadja nizo.
6. Wewe he mdru wuwo ndo wu hafilihawo naye.
7. Na ko kosa pvo wawe djuwu yeka ye kadja twahiriha.
8. Amma ye ya hudjiliya naye ngu saruho.
9. Naye nguro Mgu.
10. Pvahe ye mdru wuwo hu mba dingo hu mpuzi.
11. Tsi djawu, hakika ze aya zahe kur'ani zo beshelezizo.
12. Ye wandzo ngudjo zi yesheleya.
13. Ngiyo harumwa nkade za tukuziwa.
14. Za djusiwa za twahirishiwa.
15. Ho mhononi he malayka.
16. Wa tukufu wa tweyi.
17. Ha laaniwa mwanadamu,ye wo wukafiri wahahe mkade.
18. A ha hindru hindrini ndo ya wumbwa?
19. Ha trone la maniy ndo ya mumba yarudi ya mpanga wo mko hahe.
20. Kisha ye ndziya ha mwangusizayo.
21. Kisha ha nfisha ha mtriya ho kaburini.
22. Kisha wo wakati yandzawo ngudjo mhuyisha.

23. Tsi djawu, kadja tekeleza yizo ya mwamrisha.
24. A pvenge, nangaliye mwanadamu ye sha hula sha hahe.
25. Hakika si renyese nvuwa mnyeso mwindji.
26. Kisha ri pasuwa ye she ypvande shantsi mpasuwo.
27. Alafu ri memeleza harumwisho ye zindru za ntruda ntruda.
28. Na zabibu na ye marunku ya liwawo ne zinyama.
29. Na zaytuni na mitrede.
30. Na mazamba yenza miri mindji.
31. Na marunda na trunku.
32. Matraka ya hanyu ne zi nyama za hanyu.
33. Namwesheleye wo wakati zudjo hudja wo nvuzilwa harumwa le djedju.
34. Wo wusiku mwanadamu yadjo hu trawa ye mwananya.
35. Na mdzadza hahe [[na mbaba hahe](#)].
36. Ne mdru msha hahe ne mwana hahe.
37. Hayna mdru harumwa wowusiku wuwo ngudjo kana ndrongowo za hu mshuhulisa.
38. Nyiso yikawo wo wusiku wuwo ngazidjodo zagaza.
39. Na ngazi tsehawo no ambiliyana wuzade.
40. Na nyiso yikawo wo wusiku wuwo hodjumwizo ngapvo gapva.
- 41. Ngazidjo hubalwa ni zizda.**
- 42. Bahi wawo nde makafiri wa tumba mpaka.**

SURAT: NDO WA TOWOWAWO


Hele dzina la Adwahu Mwinyi rehema Mwindji wa yrumbi

1. Nga mlapvo he malayka wa hu towowa ze roho zahe makafiri mtowowo wa nvuwu.
2. Na hey a towowawo ye zaho wa amini ha wangu.
3. Na nga mlavo he malayka ya sihawo ha mbwiri wa tekeleze ze amri wa rihwa.
4. Na nga mlavo he malayka yako hu baliya ze roho hwenda ye mahala hazo.
5. Na he ya rihwa wo mwendeso wo wulemengu ho mbadiliho hawo.
6. Wo wusiku yeshe ypande shantsi shidjo hu rindrindra ho nvuzilwa wahe bandakume.
7. Ngodjo hu dungwa no nvuzilwa wa pvili.
8. Ze roho wo wakati wuwo ngazidjo huka harumwa wu shangavu.
9. Ye matso ya hazo ngayo ma dhalilifu.
10. Ngwa mbaao a ngaridjo hu rudi ri redjeziwa wo harumwa yila ndziya ra laho hudja (duniyani)?
11. A ndeka ri rendeha ziba za wola?
12. Wamba apvenge wuwo mredjeyi wendza hasara.
13. Hakika wo mrudishiwa wuwo yilo kiyo dzima.
14. Alafu wadji hindru piya ho djumwa ye she ypande shantsi.
15. A yi hu waswili ye kiswa ya Musa?
16. Wo wakati ye Mfomi whe ya mrumiza harumwa le baanda dji tukufu la Tuwa.
17. Yenda woha Firawuna ba hakika ha shiya ye mipaka ha wiyi.
18. Alafu wambe, a we kutsu wona na hudji rahatsa.

-
19. Nahokoza ye ndziya ya hwenda wo hahe Mfomi waho alafu wa m'amin wa mra.
 20. Alafu ha monisa wo mudjiza mhuwu.
 21. Pvahe (Firauna) ha kadhibisha na ha answi.
 22. Kisha hapva dingo ngwendo mbiyo.
 23. Alafu ha wundjiliya wo wandru alafu ha rumiza.
 24. Kisha hamba minde Mfomi wanyu ye mhuwu.
 25. Hayizo Adhwahu ha mwangamiza ha andhabu ho mrongo wa hahe wa mwiso no wa handani⁵.
 26. Hakika harumwa yez ndrongo yizo zo pica lahe wuro Mgu.
 27. A nyinyi ndo wadziro wa hu wumbwa hawu ndeze mbingu hazi panga.
 28. Ha djusiza she yzimba hazi lindjanyisa.
 29. Na hatra hidza ye masihu ya hazo na ha towowa wo wewu hazo.
 30. Na baanda ya yizo ha nyongowa she ypvande shantsi.
 31. Ha towowa ye madji ya hasho ne mimiya ya hasho hulawana nisho.
 32. Na ye milima ha yi sisimiza.
 33. Yizo hahu msterehishani na ne zinyama za hanyu.
 34. Yeka lidja lebaya kuwu (nde ntswa kiyama).
 35. Wo wusiku mwanadamu yadjo hwesheleya yizo ya renda.
 36. Wu pvenulwa wo mro he wu wono.
 37. Amma ye yenda mno harumwa wowukafiri.
 38. Ya tsunguwa wo mko namuwo wa duniya.
 39. Bahi wo mdro wa djahanama ndo marudiyo.

⁵ -Wo mwiso ndo hamba huka "**Mi nde Mfomi wanyu ye mhuwu**" no wa mwando ndesa yamba huka "**Mi ndja mdjuliyan mfaume yeka tsi ndami.**"


40. Amma ye wuro wo mhimišiwa hosoni mwe Mfomi wahe na ya haraziza ye nafusi na yizo yandzawo za hawa nafusi.
41. Bahi hakika ye mbepvo ndo maredjeyi.
42. Ngwa huzisawo ye kiyama; yendi ndo yidjo hudja?
43. Yewe hindri nahu yi vumbuwa.
44. Wo hahe Mfomi waho ndo ha hisiza wo wudjuzi wa hayo.
45. Kutsina yeka tsi ndo mhadharisho ye wi yiro.
46. Hama wo wandru wawo wo wusiku wadjo hu yi wona kwadja yeshi yeka tsi djiyo dzima hawu mtsana trasi mdzima wa hayo.



SURAT: NDEZE KHABARI

Hele dzina la Adwahu Mwinyi rehema Mwindji wa yrumbi

1. A ndrongowo hindrini ndo wadji wuzisanawo.
2. A ndeze khabari nkuwu.
3. Yikawo wowandru wawo harumwa ze khabari yizo wa khitalifiyana.
4. Tsidjau, ngwadjo hudjuwa.
5. Kisha ngwadjo hudjuwa.
6. Ye karidja djayiliya yeshe pvande shantsi shangu.
7. Ne milima yazingara hama zisonko.
8. Na ra mumbani wa yil iwa yili.
9. Na radjayiliya ze ntsindzi za hanyu wu vumzi.
10. Na radjayiliya ye masihu hama nguwo.
11. Na radjayiliya wo mtsana mdo tsashiye ye mayesha.
12. Na rawaha hodjumwanyi mbingu nfukare zanvuwu.
13. Ra djayiliya djuwa lahu wala.
14. Na ra nyesa nnuwa nyindji ynyawo hulawa harumwa ye mayngu.
15. Yili ritowe hiyo ye zindru za haba haba na ye mimiya.
16. Na bustani pvoko ye miri yi sihana hama bamba.
17. Hakika wo wusiku wahe zilipwa we hantsiziwa wo wakati.
18. Wo [wusiku](#) yidjo hhuvuzilwa harumwa ye baandakome ngamdjo hudja manfunvu ha mafunvu.
19. Na zibulwa ze mbingu zi rendeha miwango.
20. Na yendesiwa ye molima yi rendeha dja kungu.
21. Hakika wo mdro wa djahanama ngo lindiyawo.

- 
22. Wala wa shiye mipaka ha wiyi ndo marudiyo ya hawo.
 23. Ngwadjo hu baki harumwa wo mdro wuwo pandza djindji.
 24. Kwana hu dhuku sha baridi wala sha hunwa.
 25. Yeka tsi madji ya hondra ye daradja ya mwiso harumwa ho rohora na wuvundo.
 26. Zilipvwa za lingana ne zi trendwa za hawo.
 27. Hakika wawo kwadjaka hu amini ho hisabulwa.
 28. Na wakadhibisha ze aya za hatru mkadhibisho.
 29. Na hayna ndrongowo rizi dhibiti ha hwandziha harumwa shiyo.
 30. Bahi mdhuku wo mdro karina hu mzdishani yeka tsi andhabu.
 31. Hakika ye Mara [Mgu](#) ngwawona wu nalifu saanda
 32. [Na](#) bustani nazabibu.
 33. Na wana washe wendza umuri mdzima.
 34. Na midumu ya djaya.
 35. Kwana hu yshiya harumwa ye mbepvo mwaydju wala ndrabo.
 36. Zi lipvwa za lawana ne [Mfomi](#) waho mbwawa wahu hisabulwa.
 37. Ye Mfaume wahe ze mbingu neshe ypvande shantsi ne zilo pvo hari mwizo, nde Mwindji wa rehema, na kwana hu miliki wu rongowa ho hahe.
 38. Wo wusiku Djibrilu ne malayka yadjo hu hima swafi kwatsu rongowa yeka tsi nduwo ya nikiwa idhini ni Adhwahu, naye kana hwamba yeka tsi zahaki.
 39. Wuwo ndo wusiku wahe haki; apvenge hayni wandzo na djandaliye wo hahe [Mfomi](#) wahe marudiyo.
 40. Hakika si ri mhadharishani andhabu ya kurubiya, wo wusiku mwanadamu yadjo hangaliya yizo ya trendeza ye mihono ya hahe, na ye kafiri ngudjo hamba kerenge ntso kaya kafu.

تسهيل القراءة

MSAHILISHO WO MSOMO

NDE ALFUBE YASHI KOMORI

| الحروف العربية | HARUFU ZAKI KOMOR | الحروف العربية | HARUFU ZAKI KOMOR |
|----------------|-------------------|----------------|-------------------|
| أ | A | ظ | DHW |
| ب | B | غ | GH |
| ت | T | ف | F |
| ث | TH | ك | K |
| ج | DJ | ل | L |
| ح | H | م | M |
| خ | KH | ن | N |
| د | D | هـ | H |
| ذ | DH | وـ | W |
| ر | R | يـ | Y |
| ز | Z | ذـ | ZW |
| س | S | قـ | PV |
| شـ | SH | غـ | NG |
| صـ | SW | پـ | P |
| ضـ | DHW | چـ | C |
| طـ | TW | | |

AL KUR'ANI LKARIM

Pvwamwedja ne Tardjoma ya bayo
ne Engha Yaki Komori

Mutardjim
MAULANA YUSUF AHMAD YUSUF
(AMDJAD)

Vi towolwa nkosa ni

SYD TWAHIR BEN SYD AHMED MAULANA
(MUFTI L'DJAMHURI)

Pvwamwedja na kungumanyo la ma fundi

MSHAYSHI

Jamiyat Addawatu l'Islamiya - Comores
Mitsudje Hambu
B.P. 5227 Moroni - Union des Comores
Email: asproislam@gmail.com

Anjuman Khudam ul Quran Sindh Karachi
Quran Academy Yaseenabad,
Block-9, Federal B, Area Karachi Pakistan.
Ph: (0092) 021-36806561
Email: publications@quranacademy.com
www.quranacademy.com

